

4L Trophy

U « 4L Trophy » hè ciò ch'ellu si chjama un « Raid Aventure » in u desertu Maruccanu. Detta cusì, omu pensa subito subito à una razza di « Paris-Dakar » ; invece s'è u nome vi face pensà à un Rallye, o à un emissione di tele realità, capiscerete prestu fattu chè vò vi sbagliate...

I Ragguagli di l'Università

N° 142
Maghju 2009

Cuntattu :
Daria Maria Luciani
Studiente 1^u annu LCC

A nascita di un « Raid Aventure »

Creatu in lu 1996, u « 4L Trophy », hè una prova spurtiva è umanitaria urganizata da i studienti francesi ma dinù d'Europa sana.

U spiritu di sta sperienza hè unicu : difatti, ci hè d'un latu sta cerca di sensazione forte, ma dinù d'un altru latu : a missione umanitaria. L'idee maestre chì portanu stu prugettu sò : l'aiutu, u « fair-play » cum'ellu si dice in inglese, è a scupertà. Tandu, una parolla sola hè in bocca à i nostri giovani : « sulidarità » !

Sta corsa, riservata à i studienti hè proposta à a giuventù cù un idea propiu uriginale : varcà u disertu maruccanu cù una 4L. Tandu, à i studienti li tocca à fà 6000 chilometri, cù una vitturetta carca à materiale sculare per i zitelli i più povari di u Maroccu.

I nostri studienti in u disertu Maruccanu

Quist'annu, l'Università di Corsica hè stata rapresentata da Alexandre Gavini, studente in seconda annata di « scienza di a vita » à a facultà di scienza, è da Anais Poli, studente in prima annata di Dirittu è « copilotu » per stu « 4L trophy ».



Alexandre Gavini è Anais Poli, i studienti di l'Università di Corsica

A 20 anni, Alexandre Gavini, cum'è parechji studienti europei, hà sceltu di participà à sta prova strasordinaria.

A principiu era una scumessa trà amichi, prima d'esse un prugettu cuncretu. A dice ellu : « *L'humanitaire m'a toujours attiré* », è ammenta a so sperienza cù un custatu propiu impurtante : « *C'est toujours dans la dynamique de l'entraide !* ».

In stu sensu, i dui giuvanotti, durante e duie simane di u « Raid » anu avutu sempre a listessa primura, quella di l'aspettu umanitariu, di pettu à a classifica in a corsa.



In corsa pà l'associu « Les enfants du désert »

Una sfida ecologica è umanitaria

Eccu i nostri dui studienti curtinesi, à parte cù 150 chilò di materiale sculare in vittura per ghjunghje à Merzouga induve saranu distribuite.

D'altronde ci tocca à mette in risaltu un antra preoccupazione di l'urganizatori è di i partecipanti : quella di u rispettu di l'ambiu, cù una sfida ecologica in sta prova di u « 4L trophy » : l'« Eco challenge ». Tandu, l'ogettivu hè a messa in ballu d'azione ecologiche, per indettu a stallazione di l'elettricità in e famiglie povere, arricchenduli « pannelli solari », o dinù « désert Propre », tira avanti è passa.



I zitelli Maruccani salutandu i partecipanti à Merzouga

L'associu « corsica human trophy » creatu à u mese di ghjunghju scorsu, è aiutatu da l'Università di Corsica, face valè un bilanciu positivu, cù più di 60 tone di materiale sculare chì sò ricalati à l'associu « Les enfants du désert » chì ellu s'incaricheghja di a so distribuzione in e scole maruccane.

Teneremu à mente un sciffru : da 3000 zitelli scularizati annu, sò 5000 quist'annu à pudè andà à a scola ! Inquant'à l'edizione di u 2010, si pò di chi u « Raid 4L Trophy » si passerà torna à u Maroccu, da u 18 à u 28 di ferraghju. A st'eventu, ci parteciperanu 2000 studienti, è, frà tutti quessi, « u nostru » Alexandre Gavini. Iè chì ci hà assicuratu ch'ellu ci anderà cù tutta a so squadra ...